



# DABA-DABA

Rebolusyonaryong Pahayagan Pangmasa sa Panay

Tuig 43, Numero 13

Hiligaynon nga Edisyon

Disyembre 2020

## Editoryal

### ***Ipakigbato kag agumon ang hustisya para sa mga biktima sang pasismo sang rehimeng US-Duterte!***

**G**inbandera sang tuig 2020 ang labi nga kabangis sang pasismo sang rehimeng US-Duterte. Sa ikaapat nga tuig sang paghari ni Duterte iya ginpatilaw sa pumuluyo kag tanan nga nagapamatuk ang dalit sang iya kapintas nga labaw pa sa ginhimo sang diktador nga si Marcos.

Sa tulod sang ambisyon nga magpabilin sa poder lampas pa sa iya termino gingamit ni Duterte ang iya gahum para koronahan ang kaugalingon bilang numero uno nga terorista kag diktador nga naghugakom sang tanan nga estado poder pabor sa iya interes kag sindikato nga junta militar kag mga kroni. Iya ginpatuman ang pinakamalawig nga military lockdown para pungan ang paghulag sang pumuluyo sa tabon sang pagtapna sang paglapta sang Covid-19. Ginpasar ang Anti-Terror Law para pahugon, pakugmaton kag himuong nga ligal ang pagpamatay sa iya mga kritiko, mga aktibista kag ordinaryo nga pumuluyo nga nagapamatuk sa iya mga kontrapumuluyo nga mga programa.

Sa tunga sang pagluntad sang pandemya nabuyagyag ang pagka-inutil kag kriminal nga kapabayaan sang rehimen para hatagan sang lubad



ang nagalala nga kaimulon, kawawad-on sang pangabuhian kag lapnagon nga gutom. Wala o hungod nga ginbalewala sang pasista nga gobyerno ang mga lehitimo nga demanda sang pumuluyo para sa ikaayong lawas, trabaho, libre nga edukasyon, matuod nga reforma sa duta, kag ayuda sa mga biktima sang kalamidad.

Maathag nga ang talum sang terorismo ni Duterte nakapuntiryra indi lang sa armado nga rebolusyonaryong kahublagan kundi pati sa indi armado nga ligal demokratiko nga kahublagan sang pumuluyo nga iya ginakabig nga daku nga katalagman sa pagpabilin sa poder. Sa binuang nga gera kontra-druga, kontra-Moro kag labi na sa gera kontra insurhensya, daw mga binuy-an nga ido buang ang NTF-ELCAC kag ang AFP kag PNP sa pagpang-red-tag, pagpamahug, pagpanglagas kag pagpamatay sang mga aktibista, lider-masa, kritiko kag inosente nga mga sibilyan sa kasyudaran kag kaumhan.

Ini nga tuig nabatyagan sa Panay ang labi nga pagsingki sang pasismo sang rehimen. Sa tunga sang pandemya, sa sulod sang duha ka bulan (April 18 - June 2020) ginpatay sang 61stIB kag mga death squad

# TAPAZ 9



ang lider mangunguma nga si John Farochilin, anay organisador nga si Harold Tablazon, ang SK chairman nga si Jason Bunda kag Bayan Muna coordinator nga si Jory Porquia. Dugang sa mga krimen sang 61<sup>st</sup> IB ang 11 nga iligal nga gin pang-aresto kag gintortyur, 2 nga gin-abduct, 2 nga gin-interrogar kag pisikal nga gin-abuso. May 42 ka iligal nga gin pang-aresto sang PNP, Iloilo City. Wala lang dira nag-unat ang pagpang-abuso sa tawhanon nga kinamatarung sang militar kag kapulisan. Padayon nga nagalala ang mga paglapas labi na sa kaumhan nga kahimuan sang mga pasistang pwersa sang estado nga nagakonduktang retooled community support program (RCSP). Sila ang nagapamilit sa pumuluyo sa kabaryohanang ‘mag-surender’, ideklarar nga ‘persona non grata’ ang CPP-NPA-NDF, ‘mag-rally’ batuk sa CPP-NPA kag pahugon sila nga prisohon tubtob nagakabuhi kon sila ang magsuporta o

magbulig sa mga kaupod nga rebolusyonaryo. Masobra 100 ka barangay sa 20 ka banwa sa apat ka probinsya sang isla ang wala-untat nga ginpaidalum sa combat kag strike operations sang mga mersenaryo kag pasista nga tropa nga nagtuga sang kahadlok sa masa kag nagdistorbo sang ila kalinong. Madamo nga katapo sang mga ligal demokratiko nga organisasyon ang ginaharas sang mga pamahog nga patyon, ginasundan, malisyoso nga ginabansagan nga ‘komunista’ kag terorista kag ginahulogan sang warrant bangud sang mga patu-pato nga kaso.

Wala na ginpatapos sang rehimeng Duterte ang tuig sang ginbunal sini ang pumuluyong Panayanon sang brutal nga kampanya sang pagpamatay. Sa ginkasa nga operasyong SEMPO (synchronized enhanced police and military operation) nga Oplan Arvak-Panay sang PNP kag Oplan Paglalansag Omega sang CIDG, 9 ang brutal nga ginmasaker kag 16 ang gin pang-aresto sang gingtingob nga pwersa sang PNP kag AFP sa siyam ka nabukid nga kabbarangayan sang Tapaz kag Calinog sang kaagahan sang Disyembre 30, 2020. Sa estilo sang tokhang pwersahan nga ginpangsulod, gindakop kag gintiro ang mga target sa ila panimalay sang pasistang kapulisan. Ang mga ginpamatay amo sanday Tumanduk chairman kag ex-brgy captain nga si Roy Giganto, brgy kagawad Reynaldo Katipunan kag Mario Aguirre sang Lahug, lupon member Eliseo Gayas, Jr. sang Aglinab, Maurito Diaz sang Tacayan, Artelito Katipunan sang Acuña, brgy captain Garson Catamin kag Rolando Diaz, Sr. sang Nayawan, kag Joemar Vidal sang Daan Sur. Halos kalabanan sa mga biktima mga kilala nga lider kag personalidad sang pumuluyong Tumandok nga nagapangapin sa duta sang ila katigulangan batuk sa makahalalit nga mga proyekto pareho sang Jalaur megadam, NGP kag pagpanglanggab sang ila duta sang 3ID, PA.

Luyag sang terorista nga presidente nga ang madamuan nga pagpamatay kag iban pa nga pasista nga pamaagi ang dalayon nga mapakugmat kag



*Ang Daba-Daba ang rebolusyonaryong pahayagan pangmasa sa Panay. Ginapublisar ini makaisa kada bulan. Ginabaton sang Daba-Daba ang ano man nga kontribusyon sa porma sang mga artikulo kag balita kag mga suhestyon para mapauswag ang aton pahayagan.*

@panayrevinfo  
@Daba-Daba Panay  
dabababapanay.home.blog

**Sa subong nga Isyu**  
**\*Editoryal: Ipakigbato kag agumon ang hustisya para sa mga biktima sang pasismo sang rehimeng US-Duterte!**

p1

- \* Madinalag-on nga mga opensiba sang BHB p3
- \* Ang rebolusyonaryo nga pamilya ni Ka Bet p3
- \* Patubas sang Paghimakas p4
- \* Mga Balita p6
- \* Binalaybay p7
- \* Rebanek p8
- \* Caduy p9
- \* Ngita Tinaga p10

magapahipos sa pumuluyong Panayanon. Sa baylo nga mahadlok mas nagakapukaw kag nagadabdab ang balatyagon sa pagbato sang ginapigos kag ginalapak nga pumuluyo. Halin sa umpisa wala sang sin-o man nga diktador o tirano nga nakapugong para ipabutyag ang ila kaakig sa nagapanglupig kag nagatapak sa ila mga kinamatarung kag handum nga mahilway. Ara sa

ila dughan kag pamensaron ang pagtimalos sang ila mga kautoran, ginikanan, himata kag kaabyanan nga ginpamatay sang uhaw sa dugo nga pasistang estado. Madasig nga nagakatipon ang ila nga dumot pakadto sa pagribok para ibagsak ang terorista nga rehimeng-US Duterte agud agumon ang rebolusyonaryo nga hustisyosa. #DD

### **Madinalag-on nga mga opensiba sang BHB**

**S**ining bulan sang Disyembre, liwat nga ginsug-alaw sang pumuluyo kag mga pulang hangaway ang mapanghalit nga operasyon sang teroristang militar ni Duterte sa Panay.

**Disyembre 9.** 2 ka madinalag-on nga atake ang gintigayon sang mga yunit sang NPA-Mt. Baloy command sa naga-operasyon nga tropa sang 12IB sa Brgy. Buri, Tapaz, Capiz. Kaagahan sang una ginpalukpan ang mga militar sa sityo Lanas kag pagka-alas-4:00 sang hapon liwat nga gin-atake ang isa ka kolum nga nagapondo sa sityo Pasohan sang

amo nga baryo. Isa ang patay kag indi magnubo sa lima ang pilason sa bahin sang mga pasista nga soldado

**Disyembre 16.** Alas -4:00 sang hapon ginpalukpan sang command detonated explosives (CDX) sang isa ka yunit sang NPA-Napoleon Tumagtang Command ang nakasakay sa patrol nga pulis sa Brgy. Balicuas, Tubungan, Iloilo. Nag-angkon sang kasamaran ang 3 ka personel sang PNP lakip ang Chief of Police sang Tubungan nga nakasakay sa amo nga salakyen. #DD

### **Ang rebolusyonaryo nga pamilya ni Ka Bet**

“ Wala guid si tatay nagkulang sang pagpaintindi sa amon. Masami nga ginaistoryahan namon ang mga bagay-bagay kay siling niya, gamay man ukon daku nga bagay, dapat istoryahan naton.” Sa paghanday sang isa niya ka bata, amo ini ang matingkad nga madumduman niya sa iya amay, si Ka Bet.

Malawig na nga nagtaliwan si Ka Bet bangud sang balatian apang bisan sa iya kaapuhan kag anum nga kabataan, buhi ang iya handumanan bangud masami nga gina-istoryahan sang pamilya ang mga gawi kag masami nga ginahambal ni Ka Bet.

Sa adlaw mismo sang peke nga kahilwayan sang Pilipinas, June 12, 1951, sa banwa sang Oton sa Iloilo, ginbun-ag ang isa ka matuod-tuod na rebolusyonaryo nga lubos sa tagipusuon nga mangunguma, naka-tapos ini sang grade 6. Pero wala imi nagpugong sa iya nga hakson ang teorya sang proletaryado, ang Marxism-Leninismo-Maoismo.

Halos maga-sisenta na ang iya edad sa iya pagtaliwan; lapit kwarenta ka tuig sang iya kabuhi ang ginhadalid niya para sa kahublagan. Ang iya legasiya, para sa iya asawa nga si Minying, amo ang pagpanindugan sang iya pamilya sa husto kag prinsipyado nga pagpangabuhi. Suno kay Minying, masamo nga ginahambal ni Ka Bet nga kon wala lang



naghimakas para sa paghilway sa kahilwayan. Naghalin sa pamilya sang mga pigado nga

siya sang ginabatyag, handum niya guid nga maka pultaym sa kaumhan upod sa mga hangaway.

Nangin aktibo si Ka Bet sa kahublagan sang narekrut sya sa iya palamugnan sadtong 1971. Nagatrabaho si Ka Bet sa isa ka weaving mill bilang isa ka manug-laba sang bunang. Sang 1976, nangin katapo sya sang unyon kag diri nag-umpisa ang iya pagtungod sang trabaho sa kubay sang mga mamumugon tubtob nga nagpultaym bilang organisador. Wala na sadto nagatrabaho si Minying

bangud sang pagpahalin sa iya sa palamugnan sang nagbusong siya. Sa umpsisa pa lang sang ila relasyon, gintudluan na siya ni Ka Bet nga magpaninguha kag magmato-mato kag magbuligay sa ila responsibilidad sa pamilya kag kahublagan. Sang 1978, nagkapot sang hilikuton bilang organisador sa hanay sang transport si Ka Bet.

Madumduman sang iya mga kabataan ang masami nila nga pagtipon kag pag-istorya. Wala sang kakapoy si tatay nila sa pagpaathag sa ila. Ginpadaku sila sa panugyan nga hindi sila maghipos; kon sa husto man lang sila dapat maghambal sila. Halin sang gamay pa, ginpadaku na sila nga mangin maayo nga tawo kag gintudluan nga maisog nga atubangon ang mga kabudlayan sa matag-adlaw. Sadto nga ginadala sila ni tatay nila sa rali, daw hampang lang kuno para sa ila. Apang, nahangpan nila kag natun-an sang ulihi nga hakson ang prinsipyong ginapanindugan sang ila amay. Ginpasiguro ni Ka Bet kag Ka Minying na ang ila kabataan maka-intiendi kag mag-dako santo sa oryentasyon, kamuklutan kag pag-kilala sa rebolusyonaryo na kahublagan kag sa kawsa sini.

Makita sang pamilya ni Ka Bet ang kaukod sini sa paghanda sa hilikuton; sa tagsa ka gab-i, antes magtulog, masami nga mabukad ini sang iya notebook kag lantawon kon ano ang mga hilikuton para sa madason nga adlaw. Mapisan, pursigido kag maukod siya nga magtuon kag magbasa- ang laragway sang ila amay nga nagatuon kag nagahanda para sa paghatag sang pagtuon ang nagapabilin sa ila paminsaron. Madumduman man nila ang masami nga ginahambal ni Ka Bet nga "hindi ma-edukar ang masa kon akigan sila". Suno sa isa niya ka bata, matuod nga nagapangakig ang ila amay apang makit-an nila nga sa pagtungod sini sang hilikuton, sa pagpangrekrut kag pagpropaganda sini, malumanay ini kag pasensyoso nga nagapa-athag.

Tuman nga kalipay ang ginbatyag sadto ni Ka Bet sa pag-pultaym sang isa ka bata. Siya mismo ang nag-

ayo sadto sa mga kaupod nga dal-on ang iya anak sa kaumhan agud makita ang kahimtangan didto kag makaamot man sa kahublagan. Kasubong man ini sang kalipay nga nabatyagan niya sang nakita pa guid niya ang iban niya nga kabataan nga amat-amat man nga namuklat kag nagatubong sa pagbag-o sang garuk nga katilingban.

Para sa iya kabataan kag asawa, ang legasiya ni Ka Bet makit-an sa pagpalangga nila sa kawsa nga ginkabuhi ni Ka Bet. Nangin daku nga bugal sang ila pamilya nga asta sa kaapuhan nila nagpabilin ang hugot nga pag-uyat sa prinsipyong pag-alagad sa pumuluyo.

Kaangay sang iban nga mga rebolusyonaryo, baganihan kag martir, mapag-on nga gin-balay ang kabuhi ni Ka Bet sa pundasyon sang teorya sang MLM kag sa praktika sang rebolusyon. Bisan sa pinaka-ulihi nga bahin sang iya kabuhi wala niya ginbuy-an ang prinsipyong rebolusyon. Suno sa iya asawa, sa panahon nga yara na sa hospital si Ka Bet, madumduman pa nila ang mga diskusyon sang mga sinipi halin sa mga basehan nga kurso sang Partido. Apesar nga yara na sa bibi sang katapusan sang iya kabuhi, ang entusiyasmo ni Ka Bet sa rebolusyon yara sa gihapon.

Ang mga kaparehas ni Ka Bet kag Ka Minying pati na ang ila bug-os nga pamilya, isa ka hurawan nga pamilya. Lubos nga nagpanalaytay sa ila ang rebolusyonaryo nga pagpangikasog. Sa pagpangibabaw sang ila relasyon bilang magkaupod, nasikway nila ang personal kag makinaugalingon nga interes kag natudlo sa ila mga kabataan ang pag-alagad sa pumuluyo.

Ang rebolusyon wala nagakabuhi sa isa lamang ka tawo. Nagakadapat lamang nga habigon ang aton pamilya nga mag-partisipar sa pagbag-o sang kalibutan. Ini ang isa ka rebolusyonaryo nga pamilya, pamilya sang mga kaupod kag sang masa nga ila gina-alagaran.#DD

## **Patubas sang Paghimakas**

**W**ala pa nagasanag kag nagbugtaw si Miguel halin sa madalom nga katulogon. Alas-singko na. Sa iya pagbangon, iya nadumduman nga Byernes pa lamang. Wala siya sang pahuway umpsisa sang Lunes sa pag-ubra sa talaman kag kondusyon sang mais. Kinahanglan na niya pukawon ang iya tatlo nga kauturan para sa ila pag-eskwela.

Nagdiretso siya sa kusina kag didto niya naabtan ang iya amay kag iloy nga nagapangape malapit sa dapog. Nakaluto na sila sang pamahaw kag nagapamati ang duha sa radyo nga de-battery. Matunog ang radyo nga nagawaragwag sang balita. Ginsanagan sang kalayo sa dapog ang mga madalom nga mata sang iya iloy. Makadali nga nagtulok ini kay Miguel kag ginhagad nga mangape. Nagtango na

lamang kag gintultol ang surudlan sang kape kag kalamay.

Nag-untat sang pag-eskwela si Miguel para magbulig sa iya mga ginikanan nga nagapamugon sa kamaisan. Nagabulig siya agud mapa-eskwela ang iya mga kautoran sa hayskul kag elementarya. Subang siya sa ila apat nga magbugto. Namolde ang iya mabaskog nga lawas sa pagpamugon sa kaumhan.

Matapos niya butangan sang mainit nga tubig ang iya baso, ginkadtuwan na niya ang iya mga utod. Matawhay nga nagatulog sa ila mga katre ang tatlo. Ginpukaw niya sila kag gin-agda nga magpamahaw. Siya na lamang ang naghimos sang ila gintulugan. Nagdiresto sa paliguan ang isa niya ka utod kag nagkaon na ang duha. Ginbalikan niya ang iya kape kag nag-upod sa iya mga bugto sa lamesa. Wala pa matapos sa pagkaon ang iya mga bugto kag naglisensya na ang iya iloy kag amay nga makadto sa bukid. Dungan lamang nga magabutlak ang adlaw kon mag-abot sila sa ila kamaisan. Masako ang adlaw nila subong bangud tigtalapas sang mais.

Samtang ginatapos ni Miguel ang iya kape, ginapamensar niya ang iya hakuton nga mga mais. Gamit ang iya motorsiklo, naga-konduksyon ukon hawling siya sang mga sinako nga mais pakadto sa kilohan sa pihak nga baryo. Piso kada kilo ang bayad sa iya kag sa masami, tatlo ka sako ang iya makarga sa motor- duha sa likod kag isa sa atubang nga may kabug-aton nga 65 tubtob 80 kilos ang kada isa. Makabyahe siya sang 15 ka bes sa isa ka ka adlaw sa panahon sang tigtalapas. Makapila naman siya nga natumba sa iya paghawling. May tiempo man nga nagakagisi ang sako sang mais nga iya ginakarga kag ginabuhin ini sa iya suhol.

Natapos na nga magpamahaw ang duha niya ka utod. Wala pa maubos ang iya kape kag bitbit niya ang iya baso sa iya pagguwa sa balay. Naga-igpat ang tubig halin sa hamog sa mga dahon sang mga tanum samtang ginalantaw niya ang pagbutlak sang adlaw. Kalmado ang hangin kag manipis ang mga panganod sa kalangitan. Samtang naga-unat unat siya sa atubang sang adlaw, nakita niya nga puno sang yabok ang tapaludo kag radyos sa ruweda sang iya motor. Ekstra ang paghalong ni Miguel sa iya ginasaligan nga motor. Nagsag-ob siya sang tubig sa bubon kag

gin-umpisahan ang pagtinlo. Ginpunasan niya ang tapaludo nga nagatabon sa ruweda. Makit-an ang pagilig sang maitom nga tubig sa iya mga kamot. Sang natapos sa iya pagtinlo, iya ini ginpaandar. Painiton niya ang makina sang motor para sa byahe subong nga adlaw.

Pasado alas-sais na sang matapos ang iya mga kautoran sa paghimos. Naggwa sila sa balay nga nakauniporme. Iya na ginhagad ang tatlo para magsakay sa motor. Wala na nagpamahaw si Miguel. Bastante na ang kape niya kaina para umpsahan ang adlaw.

Mahalong ang pagpadalagan ni Miguel sa iya motor. Sa atubang ang agot nila kag ang duha yara nagasakay sa likod. Malawig ang ila byahe sa indi-sementado nga alagyan pakadto sa eskwelahan. Pwersado ang iya pag-balanse kaangay sang pagbalanse niya kon gakarga siya sang mais. Sa tig-ululan, malutak ang ini nga karsada.

Wala pa sila makapalayo sang maagyan nila ang isa ka grupo sang mangunguma nga nagapanglakaton sa karsada. Sa pinsar ni Miguel, mga manugpakyaw sa pagtapas sang mais ang mga ini. Sa pakyaw, gina-kontrata sang tag-iya sang kamaisan ang mga mamumugon para sila lamang ang maka-ani. Sa areglo nga pito-pito (7-7), pabor sa agalon ukon tag-iya ang matapas sang mamumugon nga anum (6) nga sako sang mais kag isa ang makadto sa mamumugon. Sa isa ka adlaw nga ubrahanay, pulo ka sako ang mapadpad ni Miguel kag isa ka sako ang makadto sa iya. May mga malapad nga maisan nga nagalab-ot sa beynte (20) ka adlaw para matapos.

Nagatanum man sang mais si Miguel upod sa iya ginikanan. Indi ila kaugalingon nga duta ang ila ginatamnan. Ginahunos sa ani ang binhi, abono, kag iban pa nga mga gasto. Ginatunga nila ang tubas sa tag-iya sa tungaay nga kinse-tatlo. Sa kinse ka sako nga mapatubas, tatlo ang makadto sa mangunguma. Maiwat ang pagtanum sang mais. Sila ang nagatipan sa kamaisan asta tig-alani, nagatapas sang puno, nagapanit, asta sa pagpadpad. Kon ibaligya, kinahanglan nga mabulad ini santo sa istandard nga *moisture content*.

Nagapamugon man si Miguel sa inadlaw nga suhol sang mga agalon. Sa sulhanay, ₱200 ang bayad sa mga manug-panggas sa ubrahanay humalin alas-



syete sang aga asta alas-dose sang udto kag ala-una tubtob alas-kwatro sang hapon. Ginapakaon sang tag-iya ang mga mamumugon nga naga-obra sa walo ka oras sa aga, udto, kag hapon.

Sa ila pagbyahe, mabatyagan ni Miguel ang haplos sang matugnaw nga hangin sa iya guya. Malapit na sila sa eskwelahan kag makit-an niya ang iban pa nga kabataan nga nagalakat. Ginhambalan niya ang bugto nga masunod sa iya nga bantayan ang duha pa nila nga mga utod. Naglahog pa siya nga batuan ang mga naga-bully sa ila. Nagyuhum ang mag-ulutod sa isa ka isa.

Ini ang ginasaysay ni Ka Rene nga istorya samtang ginasabat niya ang pamangkot sang kaupod bahin sa iya kasaysayan. Nangin rebolusyonaryo na subong ang daan nga Miguel nga iya ginasaysay. Subong, katapo na si Ka Rene sang New People's Army. Nagapangape sila sang kaupod samtang naga-istoryahanay sa guwa sang isa ka payag. May dala nga M14 nga riple kag nakasuksok sang bandoler nga puno sang mga bala.

Sa panahon sang tig-alani sang mais, nalab-ot siya sang yunit sang NPA nga naga-organisa sang mga mangunguma sa ilang lugar. Sa dalayon nga pag-angut sang mga kaupod iya nga nahangpan nga para sa mangunguma kag pumuluyo ang kahublagan. Gani sang nagpanawagan ang mga kaupod sa mga pamatan-on nga magpultaym wala pag-alang-alang nga nag-boluntaryo nga mangin pulang hangaway si Ka Rene. Soldado na siya sang mga sahi nga imol. Siling niya sa kaupod sa katapusan sang iya panaysayon, "Ang ginapamensar ko nalang subong ang pagpahamtang ko sa rebolusyon. Kon paano pa ako makapauswag sang kaugalingon para makabulig sa rebolusyon." Ini ang ginahimo ni Ka Rene subong para sa iya kautoran kag ginikanan- ang pagbalay sang masanag nga buwas-damlag para sa ila. #DD

*(Ang ini nga malip-ot nga istorya sandig sa kasaysayan sang isa ka kaupod sang New People's Army sa Panay.)*

## BALITA

### **Paghulag sa Adlaw sang Pangkalibutanon nga Tawhanon nga Kinamatarung**



**L**inibo nga pumuluyo ang naggwa kag naghiwat sang hublag protesta sa pagsaulog sang ika-72 nga Adlaw sang Pangkalibutanon nga

Tawhanon nga Kinamatarung sa bug-os nga pungsod. Ila ginsinggitan nga untaton ang red tagging, pagpamatay, iligal nga pagpang-aresto kag pagbilanggo. Upod ang pagdemandra para sa ayuda sa mga biktima sang kalamidad kag pandemya.

Apesar sang nagaluntad nga pandemya kag pasismo, nagpatigayon sang koordinado nga paghulag ang pumuluyong Panayanon sa lain-lain nga bahin sang isla. Naghiwat sang pagtililipon sa syudad sang Iloilo, Roxas kag Kalibo ang pila ka gatos nga pumuluyo para ipabutyag ang ila pagkundener sa malala nga paglapas sa tawhanon nga kinamatarung sa idalum sang rehimeng US-Duterte. #DD

### **Mga eskwelahan kag indibidwal ginhangkat si Celiz kag NTF-ELCAC**

**N**ag-agum sang pagpakamalaut kag ginhangkat sang mga administrasyon sang mga unibersidad kag indibidwal ang mga patu-pato nga alegasyon ni Jeffrey Celiz kag NTF-ELCAC. Nahibaluan nga sang tinalikdan nga Disyembre 10 naghiwat sang peace summit ang NTF-ELCAC sa syudad sang Passi sa diin kabahin sa

ginpabutyag ni Jeffrey Celiz nga sentro sang aktibismo kag recruitment center sang CPP-NPA-NDF ang pila ka eskwelahan diri sa Panay. Iya gintumod ang UP, WVSU kag ISAT sa Iloilo kag ang Filamer Christian University, CAPSU kag Purisima



sa Capiz. Mabaskog nga gin panginwala sang nasambit nga mga eskwelahan ang wala sang basehan nga mga nga akusasyon sang anay aktibista nga nagbaliskad bilang asset sang NTF-ELCAC nga may nagakatabo nga pagpang-rekrut sang CPP-NPA sa sulod sang kampus. “Iresponsible kag wala basehan ang mga alegasyon nga nagatuga sang alarma “ sabat sang WVSU. Nagpabutyag naman ang chancellor

sang UPV nga ang aktibismo daku nga bahin sang UP bilang institusyon nga isa man ka nagapanguna sini nga bentaha. Ginhangkat naman sang mga akademiko sa Capiz nga pamatud-an ni Celiz ang amo nga mga alegasyon.

Kinamatarung sang mga estudyante ang pagtukod sang mga organisasyon sa sulod sang mga kampus bilang pag-ehersisyo sang ila demokratiko nga mga kinamatarung. Kabahin man ang pagengganyo sa mga estudyante nga magtuon sang kahimtangan kag praktika sa katilingban bilang kabahin sang ila nga pagtulun-an.

Magluwas sa pagpang-red-tag sa amo nga mga institusyon, paliwat-liwat nga gin-akusar ni Celiz ang mga ligal demokratiko nga grupo pareho sang BAYAN, GABRIELA, ANAKBAYAN kag iban pa nga may angut sa CPP-NPA nga mabaskog man nga ginkundenar sang amo nga mga organisasyon. #DD

### **Untat-lupok ginpaiway sang CPP**

Ginpaiway sang Partido Komunista ng Pilipinas o PKP ang pagdeklarar sang unilateral ceasefire subong nga bulan sang Disyembre sa okasyon sang pagsaulog sang ika-52 nga aniversaryo sini. Suno sa PKP, wala sang basehan nga magdeklarar sang tradisyunal nga untat-lupok sa subong nga tuig sa atubang sang masingki nga terorismo sang rehimeng Duterte. Halin sang

pagpatuman sang Anti-Terror Law wala na untat ang hayagan nga red tagging kag pagpamatay sang mga aktibista kag kritiko sang rehimeng Duterte. Wala man untat ang mga opensibang operasyon, pagpangbomba, blokeyo, pagpamatay kag pagbakwit sang linibo nga mangunguma nga nagresulta sa pagkadislokar sang linibo nga mangunguma kag pagkaguba sang propyedad kag palangabuhian. #DD

### **BINALAYBAY**

### **May Balos Gid Ang Imo Kapintas Digong**

R. Montana

Adlaw-adlaw padayon ang mga balita sa tri-media subong nga panahon

Adlaw-adlaw man nga matukiban ang mga padihot ni Digong;

Mga yawan-on nga buhat batok sa pumulyong Pilipinon  
Ginatarget sang iya mga berdugong AFP kag Pulis ang kritiko nga kasumpong.

Hurong ka Digong; barumbado kag pugoso sa pumuluyo

Samtang ginabahag ang ikog sa pagsunod sa mandu sang amo mo nga kano

Paghugakom sa nabilin nga manggad ginapadihot kag ultimo nga buko

Wala na sang nabilin nga mumho sa makaluluoy nga ulihingtubo.

Apang sa madasig nga magbadbad sang tinion sa imo poder nga hulam  
Madali man mag-singki ang balatyagon sang imo biktima nga katawhan

Mga imol sa syudad, pamatan-on, kababainhan, mangunguma sa kaumhan  
Ginalista ninyo nga terorista sa pihak sang ila kapisan kag kaalwan.

Karon kay sa inyo programa kag layi kami wala na sila sang atrasan  
 Kundi ang magrebolusyon; magkapot sang armas magpabaskog sa kaumhan,  
 Lantawon ta kon may lupigon pa kamo kay kami ang mabato may hinganiban  
 Kag sa balud sang mga pag-alsa palibutan ang kasyudaran sa hingapuson.

Tandaan mo gid Digong ining matigdas namon nga hurubaton  
 Kay labo ini sa bato nga among dumot para imo gid dumdumon  
 Kay ang sumpa sang imo ginbiktima kamandag nga wala sang bulong  
 Kundi ang katumanan sang madugay na namon nga handum.

## HORRORSCOPE

**Capricorn, Dec. 22–Jan. 19:** Liwat nga magapagsik ang imo negosyo sa pagpatuman sang NTF- ELCAC ni Duterte. Mahatagan ka sang kahigayunan matapos ang malawig nga panahon sang pangremedyo-heneral bangud wala ka na sang mabaligya nga datos kay madugay ka na nagtraidor sa hublag. Malipayon ka subong kay sa NTF-ELCAC ni Digong, bisan ang pan-os may pulos. Hinay-hinay sa pagnegosyo ha, kay sa sistemang kapitalista, mahimo nga magboom ka, mahimo man nga mabust ka.


*(Kilala nga mga berdugo kag pasista nga ginbun-ag sa sini nga signos: Gen. Noel Clement, AFP Chief of Staff, Martin Defensor, ICPO Director, Phil. Army Commanding General Cirilito Sobejana*

## REBANEK

### Hibiyay kay Kaupod masaylo na, pagkasunod semana balik man sa erya

**M**ga tuig 1981-82, madamo sang mga kadre sa mga pangterritorio nga komite ang ginpanghugot para sa bag-ong hilikuton halin sa border erya. Isa na diri si ka Goring. Ang batibati nga magahalin siya sang hilikuton, ginkasubo gid sang mga kaupod kag masa. "Pat-od madugay gid makabalik kag hidlawon gid kita sa kaupod pareho sang natabo sa mga kaupod nga ginsaylo na sang hilikuton." hambal nila.

Adlaw na sang 'farewell party' para kay Ka Goring. Madamo sang mga kaupod kag masa ang nagtambong. Naghiwat sang programa bilang



pamaalam sa iya. Apang ang pinaka-high-light amo ang panugon-tugon sa iya kon diin man siya makatupa.

Madamo sang hibi-ay kag ang iban nagataramos ang luha. Hamakon mo bayaan ka na sang kaupod nga madugay kamo nag-updanay sa kabuhi kag kamatayon nga paghimakas.

Indi lang ang bayaan ang nagahibi pati man si Ka Goring nagapilisnguon man.

Natapos ang 'farewell party' nga puno sang kasubo kag hibi-ay. Kag naglakat na si ka Goring nga mabug-at man ang balatyagon.

Pagkalipas sang isa ka semana nagapulong gid ang komiteng distrito may nagpahibalo nga may nag-

abot nga istap sang isa ka organo nga maga-integrar sa teritoryo kag kinahanglan nga mag-istorya anay sa komite.

Gilayon gin-areglo ang pagsulod sang nag-abot kag naghanda ang komite. Hamakon mo halin sa istap sang mataas nga organo? Ano ayhan ang tuyo niya?

"Kinahanglan handa man kita." Kasugot sang komite. Wala madugay nag-abot ang istap. Apang ano ang kakibot sang tanan nga ang bumulaga sa ila amo si Ka Goring nga nagangisi-ngisi pa. Siya gali ang istap


nga ma-integrar kag sa estilo ni Ka Goring mahinay kag malagnay naghambal ini. "He! he! he! Dumdom nyo kon sin-o gid no! Diri ang una ko nga integrahan."

Nagkinadlaw ang tanan pero ang isa ka kaupod nagtiyabaw nga naghambal. "Yogs Goring, hamak mo kanugon sang luha ko, bal-an ko lang nga diri man lang gali ikaw mabalik tani wala ko ginyuyang luha ko." "Ti anhon ta abi ina." Segi gihapon kadlaw ni Ka Goring nga naishahan niya gid ang mga kaupod.

\* \* \*

#### HULATON ANG MADASON NGA MGA REBOLUSYONARYONG ANEKDOTA SA MASUNOD NGA ISYU SANG DABA-DABA

#### CADUY



## NGITA TINAGA

**GIYA:** Pangitaon sa kahon ang mga tinaga nga nakalista sa idalum. Markahan sang pabilog ang mga ini

RESESYON  
TIKTOK  
MULTINASYUNAL  
PARTIDO KOMUNISTA  
KORPORASYON  
PANGKALUSUGAN

BAKUNA  
MODERNISASYON  
KAUMHAN  
KADRE  
SOSYO EKONOMIKO  
MILITARISTA

MALAWIGAN INAWAY  
ANTIPYUDAL  
AYUDA  
KALAMIDAD  
BADYET  
KRISIS

M	U	L	T	I	N	A	S	Y	U	N	A	L	L	A	A	F	K	V	P
I	M	A	L	A	W	I	G	A	N	I	N	A	W	A	Y	Z	R	C	A
L	X	B	A	D	Y	E	T	T	B	D	Y	E	E	W	Y	A	I	H	N
I	B	W	Q	W	E	I	O	P	A	S	D	F	G	K	K	Z	S	X	G
T	Q	A	Z	W	S	X	E	K	A	D	R	E	D	C	A	V	I	R	K
A	F	V	T	G	B	Y	H	N	U	J	M	N	I	T	K	L	S	O	A
R	E	V	B	A	K	U	N	A	K	N	E	B	S	D	C	Q	A	A	L
I	K	B	M	X	D	A	N	D	B	A	N	I	T	C	L	A	N	D	U
S	S	E	B	E	W	Q	S	X	X	C	N	D	F	R	E	D	E	C	S
T	K	A	U	M	H	A	N	Z	C	U	B	F	S	A	Q	W	A	Z	U
A	A	W	Q	W	D	G	E	W	M	U	A	S	F	T	Y	U	I	O	G
K	B	B	N	V	D	D	I	O	D	O	O	T	K	J	M	V	N	M	A
A	S	G	H	N	C	B	K	O	R	P	O	R	A	S	Y	O	N	B	N
C	V	G	O	B	M	O	D	E	R	N	I	S	A	S	Y	O	N	V	N
V	A	A	N	M	D	H	M	J	V	F	F	W	Q	Z	X	C	N	M	V
B	D	Q	W	I	R	T	Y	K	A	L	A	M	I	D	A	D	U	I	O
P	U	A	T	I	K	T	O	K	S	D	F	G	H	J	K	K	L	Z	X
C	Y	R	E	S	E	S	Y	O	N	V	B	N	M	Q	W	E	R	T	T
B	A	N	T	I	P	Y	U	D	A	L	A	S	D	F	F	G	H	J	K
P	S	O	S	Y	O	E	K	O	N	O	M	I	K	O	S	A	D	B	N

### Sabat sa Ngita Tinaga Nobyembre 2020:

